

**Uunga siunnersuut: Qitiusumik Suliffeqarfinnik Nalunaarsuiffimmi nalunaarsuisarneq
pillugu Inatsisartut inatsisaat nr. xx, yy 2016-imeersoq**

pillugu

Inuussutissarsiornermut Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Inuussutissarsiornermut Ataatsimiititaliap suliarinninnermini ilaasortarai:
Inatsisartunut ilaasortaq Mimi Karlsen, Inuit Ataqatigiit, siulittaasoq
Inatsisartunut ilaasortaq Justus Hansen, Demokraatit, siulittaasup tullia
Inatsisartunut ilaasortaq Nicolaj Jeremiassen, Siumut
Inatsisartunut ilaasortaq Vivian Motzfeldt, Siumut
Inatsisartunut ilaasortaq Kelly Berthelsen, Inuit Ataqatigiit

1. Siunnersuutip imarisaa siunertaalu

Inatsisit naapertorlugit ingerlatsiviit tunisassiorfiilluunniit Qitiusumik Suliffeqarfinnik Nalunaarsuiffimmi nalunaarsorneqarnissamut pisussaaffeqarnerannik inatsisitigut tunngavissiiinissaq inatsisissatut siunnersuutip siunertaraa. Taamaalilluni nunatsinni suliffeqarfiit, kommunit il.il. siunissami Qitiusumik Suliffeqarfinnik Nalunaarsuiffimmi nalunaarsorneqassallutik.

Aammattaq pissutsit Qitiusumik Suliffeqarfinnik Nalunaarsuiffimmi nalunaarsuinissamut pingaarutillit pillugit maleruagassanik aalajangersaanissamut Naalakkersuisut siunnersuutikkut periarfissinneqarput. Tamatuma peqatigisaanik siunnersuutip kingunerissavaa Kalaallit Nunaanni Inuussutissarsiutinik Nalunaarsuiffiup matuneqarnissaa aammalu marloqiusamik nalunaarsuisoqartannginnissaa anguniarlugu nalunaarsuinerit tamarmik Qitiusumik Suliffeqarfinnik Nalunaarsuiffimmi pisarnissaat. Taamatuttaaq NemID-mik atuutilersitsinissaq inatsisissatut siunnersuutikkut periarfissinneqarpoq. Tamannali aatsaat pisinnaavoq suliffeqarfik Qitiusumik Suliffeqarfinnik Nalunaarsuiffimmi normoqarpat.

2. Siunnersuutip Inatsisartuni siullermeerpeqarnera

Oqaaseqaatit oqaaseqartartullu oqaaseqaataat naapertorlugit inatsisissatut siunnersuut ilaasa tapersorsorpaat ilaasalu akerleralugu. Oqaaseqartartut ataasiakkaat tikkuarpaat siunnersuut nunatsinni oqartussaaffigineqartumik utertitsinertut paasineqarsinnaasoq.

3. Tusarniaanermut akissutit

Siunnersuut 24. maj 2016-imit 21. juni 2016-imit Namminersorlutik Oqartussat tusarniaanermut nittartagaanniippoq.

Aammattaaq oqartussanut, kattuffinnut il. il. makkunanga siunnersuut tusarniutigineqarpoq: Naalackersuisoqarfiit tamarmik, Digitalinngortitsinnermut Aqutsisoqarfik, Sulisitsisut, KNAPK, EY Grønland, BDO, Deloitte Nuuk, Grønlands Revisionskontor, Nuna-Law, Kalaallit Nunaanni Eqqartuussissuserisut, Bank Nordik, Grønlandsbanken, KANUKOKA, Qeqqata Kommunia, Qaasuitsup Kommunia, Kommune Kujalleq, Kommuneqarfik Sermersooq.

Tusarniaanermut akissutit ukunannga tiguneqarput:

Aningaasaqarnermut Naalackersuisoqarfik, Ilaqutariinnermut, Naligiissitaanermut Isumaginninnermut Inatsisinillu Atuutsitsinnermut Naalackersuisoqarfik, Digitalinngortitsinnermut Aqutsisoqarfik, Kalaallit Nunaanni Eqqartuussissuserisut, Bank Nordik, EY Grønland, Qeqqata Kommunia, Kommuneqarfik Sermersooq, Kommune Kujalleq.

3.1 Inuussutissarsiornermut Ataatsimiititaliap tusarniaanermut oqaaseqaatai

Inatsisissatut siunnersuut tusarniaaffigineqartunit annerusumik tapersersorneqartoq ataatsimiititaliamit maluginiarneqarpoq. Kommune Kujalliup tusarniaanermut akissutaa ataatsimiititaliamit apeqqutini sammineqarmat ataatsimiititaliamit matumani annertunerusumik tikkineqassanngilaq. Tusarniaanerup sivilissusua imaluunniit tusarniaaneq pillugu pissutsit allat oqaaseqarfiginissaat ataatsimiititaliap tunngavissaqartinngilaa.

3.2 Tusarniaanermut akissutit ilaat

Tassunga atatillugu ataatsimiititaliaq tusarniaanermut akissummit ataatsimit, tassungalu ilanngullugu Akileraartarnermut Aqutsisoqarfiup tusarniaanermut akissutaanit tigulaariumavoq. Aqutsisoqarfik tusarniaanermut akissummini ilaatigut ima allappoq:

Akileraartarnermut Aqutsisoqarfiup oqaatigaa: "Akileraartarnermut Aqutsisoqarfiup isumaqatigaa piffissap ingerlanerani nalunaarsuineq digitaliusariaqartoq, kisiannili eqqoriarlugu unammilligassaasoq, minnerunngitsumik inuussutissarsiornikkut ingerlatsisunit minnermut, digitaliusumik aqqissuussinissaq eqqarsaatigalugu. Taamaattumik Akileraartarnermut Aqutsisoqarfiup inassutigaa sumiiffimmi kiffartuussiveqassasoq. Pissusissamisuuksaaq kiffartuussiviup taassuma Akileraartarnermut Aqutsisoqarfimmiinnissaa, maannamut tamanna misilittagaqareermat aammalu nunatsinni inuussutissarsiortunut sulisitsisunullu attaveqartuulluni."

Naalakkersuisut akipput:

”Naatsorsuutigineqarpoq Akileraartarnermut Aqutsisoqarfiup suli maanna kiffartuussinermik aaqquussineq tusarniaanermut akissummi pineqartoq ingerlatinnassagaa”.

3.2.1 Inuussutissarsiornermut Ataatsimiititaliap oqaaseqaatai

Kalaallit Nunaanni Inuussutissarsiutinik Nalunaarsuiffiup ingerlanneqarnerani aqutsivigineqarneranilu atuuffini akisussaaffinilu allangornagit Akileraartarnermut Aqutsisoqarfiup ingerlatinnassammagit aallaavittut isigalugu toqqissisimanartutut ataatsimiititaliamit isigineqarpoq. Digitalimilli periutsinut ikaarsaariarnermi suliffeqarfiit mikinerit unammilligassarinnaasaat Akileraartarnermut Aqutsisoqarfimmit tikkuarneqarput najukkamilu periutsit attatiinnarneqarnissaat kaammattuutigalugu, taama isumaqarneq Naalakkersuisut nalinginnaasumik nassuiaatini taperserpaat. Tassunga atatillugu NemID-mut, Qitiusumik Suliffeqarfinnik Nalunaarsuiffimmut digitaliusumillu ingerlatsinernut allanut ikaarsaariarneq qanoq ilillugu sapinngisamik pitsaanerpaamik eqaallisarneqarlunilu pisariillisarneqarsinnaanersoq isumaliutigeqqullugu Naalakkersuisut Inuussutissarsiornermut Ataatsimiititaliamit kaammattorneqassapput. Tassungalu atatillugu Sulisitsisut ilaatigut suleqatigalugit paasititsiniaanerit paasititsiniaanermilluunniit suliniutit allat suliffeqarfiit mikinerit Qitiusumik Suliffeqarfinnik Nalunaarsuiffimmut ikaarsaariarnerisa aporfissaqannginnerpaamik ingerlasinnaanissaanut peqataaqataasinnaassasut ilimanarsinnaavoq.

3.2.2 Qitiusumik Suliffeqarfinnik Nalunaarsuiffik ataatsimut isigalugu

Kalaallit Nunaanni Inuussutissarsiutinik Nalunaarsuiffiup nunatsinni suliffeqarfiit ingerlatseqatigiiffiillu paasissutissaataat nalunaarsorlugillu nutartertarpai. Kalaallit Nunaanni Inuussutissarsiutinik Nalunaarsuiffiup qarasaasiakkut nalunaarseriaasia 1999-imi ineriartortinneqalerpoq kukkunerussagunangilarlu paasissutissanik katersivik teknikikkut paasissutissanillu tunngaviusunik nalunaarsuiffittut ullutsinnut naleqqukkunnaarsimasoq.

Nunatsinni suliffeqarfiit ingerlatseqatigiiffiillu Kalaallit Nunaanni Inuussutissarsiutinik Nalunaarsuiffimmi normui Erhvervs- og Selskabstyrelsen Qitiusumik Suliffeqarfinnik Nalunaarsuiffimmut normorititaanut ullumikkut ilaatinneqanngillat. Ingerlatseqatigiiffiit (A/S aamma ApS) erhvervsstyrelsen ingerlatseqatigiiffinnut nalunaarsuiffiani ullumikkut aamma nalunaarsugaareerput, taamaattorli digitaliusumik sullississutinik arlalinnik atuinissamut periarfissiisumut Qitiusumik Suliffeqarfinnik Nalunaarsuiffimmut normoqartinneqarnatik. Digitaliusumik sullississutit taamaattut ilaatigut tassaapput Nemkonto, Nemhandel, e-faktura il.il.

4. Apeqqutit

Siunnersuutip ataatsimiititaliamit suliarineqarnerani atugassatut apeqqutit arlallit akissuteqarfigeqqullugit Naalakkersuisut ataatsimiititaliamit qinnuigineqarput.

Ataatsimiititaliap apeqqutaasa aammalu Inuussutissarsiornermut, Suliffeqarnermut, Niuernermit Nunanullu Allanut Naalakkersuisup akissutaata assilineri isumaliutissiissummut matumunnga ilanngussatut ilanngunneqarput. Naalakkersuisunut apeqqutini pingaartumik Kommune Kujalliup tusarniaanermut akissutaa ataatsimiititaliamit isummerfigineqarpoq.

5. Ataatsimiititaliap siunnersuummik suliarinninnera

Nunatsinni suliffeqarfiit nalunaarsorneqartarnerat Kalaallit Nunaanni Inuussutissarsiutinik Nalunaarsuiffiup aquppa. Inatsisissatut siunnersuummi takuneqarsinnaavoq Qitiusumik Suliffeqarfinnik Nalunaarsuiffimmut ikaarsaariarnermi anguniakkat ilaat tassaasoq NemID-mik allanillu qarasaasiakkut atortunik tunineqarnissamut atuinissamullu suliffeqarfiit periarfissaqalernissaat. NemID-p assigiinngitsunut atatillugu atornerarnerata pisortanut attaveqarneq innuttaasunillu sullissineq eqaannerulersissimagai paasinarsisimavoq. Taamaattumillu iluaqutissartaasa nunatsinni suliffeqarfinnut aamma atuukkumaarnissaat ilimanaateqarluinnarpoq.

Naalakkersuisut nalinginnaasumik nassuiaatini oqaatigaat Qitiusumik Suliffeqarfinnik Nalunaarsuiffimmi atuisunut kalaallisut quppernarnik suliaqartoqarnissaa naatsorsuutigineqartoq. Suliniut taamaattoq nunatsinni suliffeqarfiit mikinerit akunnattumillu angissusillit Qitiusumik Suliffeqarfinnik Nalunaarsuiffimmi nalunaarsorneqartalernissamut atuilernissamullu ikaarsaariarnerannut oqilisaaqataassasoq ataatsimiititaliamit ilimagineqarpoq. Tassunga atatillugu atuisunut kalaallisut quppernarnik pilersitsinissaq siunnerfilimmik aammalu Erhvervs- og Selskabstyrelsip oqaloqatigineratigut qulakkeerniaqqullugu Naalakkersuisut ataatsimiititaliamit kaammattorneqarput, taamaalluni Qitiusumik Suliffeqarfinnik Nalunaarsuiffimmi atuisuussagaanni pinngitsoorani danskisut piginnaasaqaaqartariaqarani.

Suliffiit mikinerit aamma ilaatinneqartussaammata digitaliusumik ingerlatsinermut ineriartornermullu malinnaaniarnerat unammillernartoqarsinnaavoq, taamaattumillu suliffeqarfiit nalunaarsorneqarnissaat pisussaaffiummat suliffeqarfiit mikinerit eqqaamaneqarnissaat pingaaruteqarpoq. Suliffeqarfiit mikinerit ikaarsaariarnerat oqinnerulersinniarlugu suliniutinik aallartitsinissaq isumaliutigeqqullugu Naalakkersuisut isumaliutissiissumi matumani piffimmi allami ataatsimiititaliamit kaammattorneqarput. Inatsisissatut siunnersuut una danskisut inatsisaata allanngortinneqartariaqarneranik nassataqassasoq Naalakkersuisut siunnersuummut nalinginnaasumik nassuiaatini allakkaat ataatsimiititaliamit maluginiarneqarpoq. Danskisut oqartussaasuunik susasaqartunik oqaloqateqarnikkut tamatuma pissusissaatut ingerlanneqarnissaa Naalakkersuisunit qulakkeerneqassasoq ataatsimiititaliamit naatsorsuutigineqarpoq.

6. Siunnersuutip aningaasaqarnikkut kingunerisassai

Siunnersuutip nalinginnaasumik kingunerisassai nalinginnaasumik nassuiaatini Naalackersuisunit nassuiarniarneqarlutillu paasinarsisinniarneqarput. Tassunga atatillugu Akileraartarnermut Aqutsisoqarfiup tusarniaarnermut akissutaa nalinginnaasumik nassuiaatini allassimasoq tikkuassallugu ataatsimiititaliaq tunngavissaqarsoraq, tassani ilaatigut ima allassimasoqarmat:

”Akileraartarnermut Aqutsisoqarfiup naatsorsuutigalugu missiliorpaa nukinnik annertuunik atuisoqassasoq ikaarsaariarnermi, ilaatigut paasissutissinernut malittarisassat nutaat pillugit, paasissutissat pigisat iluarsaannerannut, periaatsinik ineriartortitsinermut il.il.”

Naalackersuisut tamatumunnga akipput:

” Suliamut suleqatigiissitami nalilerneqarpoq CVR-imut ikaarsaarnermi nukinnik atuinissaq aningaasaliissutaareersut iluanni naammassineqarsinnaassasoq, Akileraartarnermut Aqutsisoqarfimmi GER-imut allattoqarfik CVR-imut allattoqarfingortussaammat.”

Naalackersuisut oqarnerat siuliani allassimasoq ataatsimiititaliamit tusaatissatut tiguneqarpoq. Taamaalilluni siunnersuummut nalinginnaasumik nassuiaatini allassimavoq siunnersuutip akuerineqarnera pisortanut aningaasaqarnikkut taasarialinnik kinguneqassanngitsoq. Tunngavissat pigineqartut tunngavigalugit allatut naliliinissamut ataatsimiititaliaq tunngavissaqanngilaq. Taamaalillunilu Naalackersuisut apeqqut tamanna sukumiisumik misissorsimassagaat aammalu malitsigisaanik aningaasaqarnikkut kinguneqassanngitsoq ataatsimiititaliamit tutsuigineqarpoq. Siunnersuut naatsorsuutiginnisamik pisortat karsiisa annertunerusumik aningaasartuuteqarnerannik kinguneqassagalarput aningaasartuutit taakku aningaasaliissutaareersut iluini akilerneqartussaassapput, taamaattoqassappallu suliniutinik allanik tunulliussisoqartariaqassalluni.

7. Ataatsimiititaliap inassuteqaatai

Amerlanerussuteqartut Siumup Demokraatillu ilaasortaataasa siunnersuut akuerineqassasoq inassutigaa.

Ikkerussuteqartut Inuit Ataqtigii ilaasortaataasa ima oqaaseqaateqarlutik siunnersuut itigartinneqassasoq inassutigaa.

Siunnersuutip itigartinneqarnissaa Inuit Ataqtigii inassutigissavaat makku tunngavilersuutigalugit:

Nunatsinni suliffeqarfinnik nalunaarsuinermit malittarisassat allaapput. Danmarkimi inuussutissarsionermit malittarisassani EU-p malittarisassai annertuumik maleruarneqartarmata malittarisassatigut kipungasoortoqarsinnaanera piareersimaffigiumallugu nammineq pigisatsinnik suliffeqarfinnik nalunaarsuiffeqartariaqarpugut.

Aamma, nunatta namminersuleriartornera eqqarsaatigalugu namminerisatsinnik suliffeqarfinnik nalunaarsuiffeqartariaqarpugut pisariaqalerpat sutigulluunniit naleqqussarsinnaasatsinnik.

Suliffeqarfiit nunatsinniittut danskit suliffeqarfiinik suleqateqarneranni ajornartorsiutaasinnaasut, soorlu NemID-mut tunngasut, teknikikkut aaqqitassaapput namminerisatsinnik nalunaarsuiffeqarnerput qimanngikkaluarlugu.

Siunnersuutip itigartinneqarnissaannik siunnersuuteqarnitta saniatigut Naalakkersuisut kajumissaarniapavut inatsisissatut siunnersuummi ajornartorsiutit taaneqartut teknikikkut aaqqinneqarsinnaanersut misissorluaqqullugu kiisalu aningaasat GER-mik nutarterinissamut atorneqartariaqartut qassiunersut misissorluaqqullugit taavalu inatsisartunut isummerfigisassanngorlugit upernaamut saqqummiuteqqullugit.

Taama oqaaseqarluni siunnersuummilu allassimasutut paasinnilluni ataatsimiititaliap siunnersuut aappasaaniigassanngortippaa.

Mimi Karlsen
Siulittaasoq

Justus Hansen
Siulittaasup tullia

Vivian Motzfeldt

Nicolaj Jeremiassen

Kelly Berthelsen